

TEZĂUR LITURGIC

18 IANUARIE

ACATISTUL SF. IERARHI ATANASIE CEL MARE ȘI CHIRIL, ARHIEPISCOPII ALEXANDRIEI



MOSCOVA, 2000



Акафист

СВЯТИТЕЛЯМ

Афанасию Великому и Кириллу,

Архиепископам

Александрийским

Кондак 1

Избрании от Небеснаго Пастыреначальника
отцы наша, пресветлая двоице святителие
Афанасие и Кирилле, великаго
Александрийскаго града первопрестольницы,
оружием креста и молитвы враги Церкви
Христовы победившии, песньми духовными
восхваляем вас, святых заступников наших. Вы
же яко имущии дерзновение ко Господу,
молитесь за Церковь Православную, за град ваш
и вся люди с любовию зовущия:

Радуйтесь, святители Афанасие и Кирилле,
Православия столпи непоколебимии и
богомудрии учителя.

Икос 1

Ангели земнии и человецы небеснии явистесь, святителие Афанасие и Кирилле, егда озарившесь светом истиннаго богопознания, яко два светила просвещали есте по преемству друг другу на престоле патриаршем всю землю и яко велиции иерарси и учителяе наши заградили есте еретиков злославных учение, благочестием напояюще верных. Темже и мы, истинною верою Христовою утверждении, воспеваем вам, защитникам Церкви Православныя, сице:

Радуйтесь, прелести мира сего отвергшии.

Радуйтесь, чистаго и непорочнаго жития неусыпающии хранители.

Радуйтесь, Единого Христа всем сердцем возлюбившии.

Радуйтесь, волю свою воли Божией покорившии.

Радуйтесь, образ истинныя веры в себе показавшии.

Радуйтесь, мужественно иго Христово на себе возложившии.

Радуйтесь, божественныя премудрости исполнении.

Радуйтесь, Духа Пресвятаго сосуди
избранныи.

Радуйтесь, вернии делатели винограда
Христова.

Радуйтесь, Церкви Православныя украшение.

Радуйтесь, архипастыри святыя
Александрийския Церкви.

Радуйтесь, вечныя радости наследницы.

Радуйтесь, святители Афанасие и Кирилле,
Православия столпи непоколебимии и
богомудрии учителя.

Кондак 2

Видя Сердцеведец Господь твердое твое
изволение, мудрость и благочестие, поставляет
тя, отче Афанасие, на свещнице Церкви
Александрийския, да свет святого Евангелиа
возсияет во странах Востока и просвещении
тобою людие воспевают Богу хвалебную песнь:
Аллилуиа.

Икос 2

Разумом светлым и сердцем чистым
изволению Божию повинувшися, иго Христова
благое взявше, по стопам апостолов последовали

есте на нивы духовныя, отцы наши Афанасие и Кирилле, обильно сеюще слово Божие, просвещающе паству свою благодатию и в вере истинней утверждающе многих. Темже и мы, вашими богомудрыми ученьми просвещаемии, взываем сице:

Радуйтесь, издетска Богом благословеннии.

Радуйтесь, в истинней простоте и безмолвии пожившии.

Радуйтесь, от юности себе Богу посвятившии.

Радуйтесь, еще во отрочестве любовью к слову Божию напоеннии.

Радуйтесь, житие иноческое возлюбившии.

Радуйтесь, Господеви верно послужившии.

Радуйтесь, благодать священства достойно восприявшии.

Радуйтесь, безкровную жертву о людех приносившии.

Радуйтесь, пастыри и учителя Церкви премудрии.

Радуйтесь, апостолов достойнии преемницы.

Радуйтесь, неумолкающи глашатаи истиннаго благочестия.

Радуйтесь, града Александрии щите и ограждение.

Радуйтесь, святители Афанасие и Кирилле, Православия столпи непоколебимии и богомудрии учителя.

Кондак 3

Силою разума своего, просвещенного благодатию, Троицу Единосущную: Отца Безначального, Сына же воплощенного и Духа Всесвятого проповедал еси, блаженне Кирилле, явив же ся Богородицы поборник и защитник от еретических учений. Мы же тя, яко божественного тайнописца Пребожественныя Троицы прославляем и твоим учением осиявшееся, воспеваем прославльшему тя Христу Богу: Аллилуиа.

Икос 3

Имуще ревность велию по Бозе, оружием Креста Христова вооружившееся и меч слова Божия восприимше, яко добропобеднии воины Отца Небесного противустали есте врагу спасения диаволу, отцы всеблаженнии Афанасие и Кирилле, плевелы еретических учений скоро посекающе, души заблуждших чад Божиих

спасающе, верныя же во благочестии и вере православием укрепляюще. Темже и нас предстательством вашим просветите, любовию поющих тако:

Радуйтесь, в постничестве и воздержании великим пустынножителем поревновавший.

Радуйтесь, примером вашея жизни обративший многих ко Господу.

Радуйтесь, Евангельския истины благовестители.

Радуйтесь, наставницы наши во исповедании православныя веры.

Радуйтесь, Живоначальныя Троицы почитатели.

Радуйтесь, яко Серафими огнем любви ко Господу горящий.

Радуйтесь, искоренители еретического служения.

Радуйтесь, прославивший истиннаго Бога во Святей Троице покланяемаго.

Радуйтесь, безбожных и нечестивых обличители.

Радуйтесь, паствы вашея добрии хранители.

Радуйтесь, яко вами святая вера прославляется.

Радуйтесь, яко и мы грешнии имя ваше с верою призываем.

Радуйтесь, святители Афанасие и Кирилле, Православия столпи непоколебимии и богомудрии учителя.

Кондак 4

Бурю злобы и ненависти воздвиже диавол, ища арианским зловерием погубити Церковь Христову чрез соблазненных им. Ты же, отче Афанасие, слово спасения в Никеи на Первом Вселенском Соборе велегласно возгласил еси, Ариева мнения вся упразднил еси, и Святыя Троицы державу во всем мире проповедал еси. Темже во вся концы земли истинную веру благовествовал еси, верныя же научая Богу, Содетелю всех, с любовью воспевати: Аллилуиа.

Икос 4

Слышавше, святители Афанасие и Кирилле, глас Христов, к подвигу стояния за веру даже до смерти призывающий, Пастыреначальнику Христу последовасте, покоя не имуще ради неусыпных трудов во спасение паствы от

волков, расхищающих ю, и подвиг сей чрез все житие ваше понесше, ныне вечный покой в райских обителях обретосте. Мы же очи сердец наших возводяще ко Господу, по долгу любви прославляем память вашу, со умилением зовуще сице:

Радуйтесь, Троицы Святыя вернии служители.

Радуйтесь, истины Христовы пламеннии ревнители.

Радуйтесь, еретическая учения безумного Ария мужественно обличившии.

Радуйтесь, поборницы правыя веры непоколебимии.

Радуйтесь, богомудрыми словесы уста заблуждших заградившии.

Радуйтесь, Церковь Христову от лжеучений сохраняющии.

Радуйтесь, пастыри, волков от стада Христова отгоняющии.

Радуйтесь, душу свою за чад духовных положите готовии.

Радуйтесь, сокровищницы богословия преизобильнии.

Радуйтесь, насадители истинного
благочестия.

Радуйтесь, богоблаженнии исповедницы
православныя веры.

Радуйтесь, ко спасению верным
путеводители.

Радуйтесь, святители Афанасие и Кирилле,
Православия столпи непоколебимии и
богомудрии учителя.

Кондак 5

Боготечная звезда, возсиявшая во
Александрии, явился еси, святителю Кирилле,
просвещаемый от Солнца Правды Христа Бога,
своим немерцающим светом озаряющий страны
Востока и якоже звезда Вифлеемская, верный
путь ко Христу показал еси, да просвещеннии
тобою людие воспоют Ему благодарственную
песнь: Аллилуиа.

Икос 5

Видяще чада Церкви Александрийския
евангельское благовестие ваше и стояние до
смерти за Церковь Христову и правду Божию,
обращахуся от еретических заблуждений к
истинней вере. Вы же, яко пастыри добрии, с

любвию принимали есте ищущих спасения, Господа всем сердцем благодаряще за милость Его к кающимся. Сего ради радостными песнопеньми восхваляем вас, отцы святии, и глаголем:

Радуйтесь, молитвенницы, Духом Божиим озареннии.

Радуйтесь, светильницы, просвещающие души наша.

Радуйтесь, разум свой в послушание веры предавшии.

Радуйтесь, право славить Бога нам завещавшии.

Радуйтесь, благодатию Христовою еретическая мудрования побеждавшии.

Радуйтесь, верных от ересей оградившии.

Радуйтесь, диавола и слуг его обличившии.

Радуйтесь, преславнии верующих заступницы.

Радуйтесь, ревностию по вере пророку Божию Илии уподобившиися.

Радуйтесь, яко пророк Даниил и трие отроцы мужественно Бога прославившии.

Радуйтесь, чрез все житие на ниве Господней потрудившийся.

Радуйтесь, и по смерти от паствы своей любовью не отлучившийся.

Радуйтесь, святители Афанасие и Кирилле, Православия столпи непоколебимии и богомудрии учителя.

Кондак 6

Проповедник истинного учения о Христе и Пречистой Его Матере миру явился еси, святителю отче Афанасие, силою благодатного слова твоего и богодухновенных писаний леств богохульную Ария посрамил еси и многия беды от врагов Православия претерпел еси: изгнание несправедное от престола Александрийска, темничное заключение и гонения. Сего ради вси зряще тя, яко пастыря добраго, душу свою за овцы полагающего, возопиим Богу прославляющему святых Своих: Аллилуиа.

Икос 6

Воссияли есте яко светила на небе церковнем, святители Афанасие и Кирилле, подвигом жития вашего показующе всем верным путь к незаходимому Свету Христу. Темже молим вас,

помозите тму неверия и развращения в мире Божием разгнати, да вси любящии и чтущии Бога в духе и истине, взывают вам сице:

Радуйтесь, весь мир словесы вашими озаривший.

Радуйтесь, податели света Христова народом православным.

Радуйтесь, звезды светлая, освещающая нас в нощи греховней.

Радуйтесь, Церкви Христовы незаходимое сияние.

Радуйтесь, истинныя веры ревнители.

Радуйтесь, яко во всех странах Востока изыде вещание учения вашего.

Радуйтесь, во изгнании и гонении от еретиков Бога благодаривший.

Радуйтесь, поношения многая от них мужественно претерпевший.

Радуйтесь, поборницы веры во Христа неустрашимии.

Радуйтесь, всех, за истину гонимых, прибежище.

Радуйтесь, всем нам отцы духовнии и наставницы благочестия.

Радуйтесь, путеводители наши во Отечество Небесное.

Радуйтесь, святители Афанасие и Кирилле, Православия столпи непоколебимии и богомудрии учителя.

Кондак 7

Хотяще изгнати тя с престола Церкви Александрийския, еретицы оклеветаша тя, святителю отче Кирилле, пред царем Феодосием. Егда же сей добрее твое житие уведо, абие посрами клеветавших и соборище их еретическое разгна, еретика же Нестория с патриаршаго престола Царьграда сверже, ты же постави главою Вселенскаго Собора во Ефесе. Ты же, отче святой, ересь Нестория на Соборе посрамив, Богородицу и Матерь Света возвеличил еси и Бога прославил еси, воспевая Ему благодарственную песнь: Аллилуиа.

Икос 7

Новаго винограда Христова вашими труды насажденнаго достойнии делатели и хранители явистесь, отцы святии, и яко вернии раби

Христовы, в радость Господа Своего вшедшии, на Небесех ныне ликовствуете и молитвами своими утверждаете веру нашу, ко спасению ходатаиствующе пред Богом за нас грешных, да благодарне воспеваем сие:

Радуйтесь, ересей Ария и Нестория обличители.

Радуйтесь, защитницы наши от зловредных мудрований.

Радуйтесь, наставницы заблуждших от пути праваго.

Радуйтесь, яко светом боговедения просвещаете помраченныя умом.

Радуйтесь, струями благодати сердца многих напоившии.

Радуйтесь, неусыпнии стражи нашего спасения.

Радуйтесь, воины Христовы, еще в жизни от Него славою венчанныи.

Радуйтесь, яко подвиги и труды ваша вернии немолчно воспевают.

Радуйтесь, богатство духовное многим людям принесшии.

Радуйтесь, к пристанищу спасения их направивший.

Радуйтесь, научающий нас радоваться о Господе.

Радуйтесь, скорби наша в радость претворяющий.

Радуйтесь, святители Афанасие и Кирилле, Православия столпи непоколебимии и богомудрии учителя.

Кондак 8

Странно и дивно воистинну есть видети, како новая буря прииде на Церковь Божию, егда царь Иулиан вся идольская капища отверзе, жертвы ложным богам творя. И паки на тя, святителю Афанасие, воста, яко врази веры Христовы рекоша царю: «Аще Афанасиа не погубиши, несть мощно христианство извести». Ты же, отче святыи, пророчествовал еси, яко сей мятеж скоро разрушится и противоборствовал еси богоотступнику Иулиану, умоляюще Господа и Пречистую Его Матерь разрушити злое его на христиан умышление, да вси вернии благодарно поют Богу песнь: Аллилуиа.

Икос 8

Вси сынове российсти проповедуют
благодатную помощь вашу, святители
предивнии Афанасие и Кирилле, от лет бо
древних отцы наша уведеша вас, яко
заступников от нашествий иноплемennных и
избавителей от моровых поветрий. Темже и мы,
вернии чада Церкви Христовы в земли
Российстей, приносим вам хваление сие наше:

Радуйтесь, в земли Российстей верными
возлюбленнии.

Радуйтесь, Православия в стране нашей
поборницы.

Радуйтесь, о любящих и чтущих вас
предстатели.

Радуйтесь, податели света Христова народом
православным.

Радуйтесь, многим двери в Царствие
Небесное отверзшии.

Радуйтесь, о спасении рода христианского
ходатаи.

Радуйтесь, праведным житием вашим вся
окрестныя страны удивившии.

Радуйтесь, яко вси благочестивии людие о именах ваших веселятся.

Радуйтесь, любви Христовы истиннии хранители.

Радуйтесь, христианом всех времен в молитвах наставницы.

Радуйтесь, венцем терпения на земли венчанныи.

Радуйтесь, светом вечным на Небеси осияннии.

Радуйтесь, святители Афанасие и Кирилле, Православия столпи непоколебимии и богомудрии учителя.

Кондак 9

Всякое естество ангельское удивися славному житию твоему на земли, святителю отче Кирилле, ибо показа тя Господь твердаго заступника Православия. Ты бо повсюду Евангельския истины возвещал еси, верных утешая и тако сохраняя еси их от еретических учений. Темже и ныне не оставляй нас, грешных, но всех чад Божиих в православии и единомыслии утверди, да в радости духовней

воспоем Троице Святей благодарственную
песнь: Аллилуиа.

Икос 9

Ветии многовещанныя превзошли есте силою
богодуховенных словес и писаний ваших,
святители богомудрии Афанасие и Кирилле, вы
бо воплощенное Слово богословили есте,
просвещающе души многих, верно показующе
им путь ко спасению, по немуже сами неуклонно
шествовали есте до блаженныя кончины вашея.
Мы же радуящиеся, яко таковы имамы учителя
жизни духовныя и молитвенники, прославляем
вас, отцы святии, глаголюще:

Радуйтесь, пастыри добрии, о славе
Господней ревновавшии.

Радуйтесь, дарованный вам талант
приумножившии.

Радуйтесь, странницы земнии, во Отечество
Небесное вшедшии.

Радуйтесь, с лики небесных сил ныне
торжествующии.

Радуйтесь, светила, во тме заблуждения
сущих озарившая.

Радуйтесь, сего ради велии во Царствии Божием нареченнии.

Радуйтесь, венцы исповедническими от Бога украшеннии.

Радуйтесь, в лице святителей великих славою мною превознесеннии.

Радуйтесь, богомудрии вселенныя учителя.

Радуйтесь, со всеми угодники Божии о нас Господу молящися.

Радуйтесь, яко вами прославляется вера христианская.

Радуйтесь, яко имена ваша написана суть на Небесех.

Радуйтесь, святители Афанасие и Кирилле, Православия столпи непоколебимии и богомудрии учителя.

Кондак 10

Спасти хотя стадо Христово от погибели, святителю Афанасие, не убоялся еси прещений царских, ни клевет от еретиков, ни заключения темничнаго, но вся сия, яко доблий воин Христов претерпев, не преставал еси просвещати паству твою, моля ученики твоя

твёрдо стояти во истинней вере, ниже козней вражиих устрашаться, но и в скорбех и напастех за вся благодарити Бога, поюще Ему песнь: Аллилуиа.

Икос 10

Стена есте несокрушимая всем православным людем, двоице всехвальная и досточудная, святители Афанасие и Кирилле, ибо Небесе и земли Творец избра вас быти на земли твердии защитницы и непоколебимии столпи веры истинныя, и к лику великих святителей и учителей Церкви Христовы сопричте. Темже умолите благодати Божия сподобитися и в истине устояти всем нам, любящим вас и вопиющим таковая:

Радуйтесь, истину Христову пред людьми небоязненно вещавшии.

Радуйтесь, догматов церковных хранители.

Радуйтесь, божественная слова в сердцах своих носившии.

Радуйтесь, богомудрыми писаньми вашими сокровище духовное нам оставившии.

Радуйтесь, душ наших от лести сатанинския защитницы.

Радуйтесь, яко молитвами вашими побеждаем козни диавольския.

Радуйтесь, душевных и телесных недугов наших целители.

Радуйтесь, напастями обуреваемых тихое пристанище.

Радуйтесь, всякаго добра временнаго и вечнаго податели.

Радуйтесь, ходатаи наши пред престолом Судии Небеснаго.

Радуйтесь, яко чистым сердцем Бога ныне зрите.

Радуйтесь, яко и по отшествии в Небесныя обители попечения о нас не оставляете.

Радуйтесь, святители Афанасие и Кирилле, Православия столпи непоколебимии и богомудрии учителя.

Кондак 11

Пение молебное наше, во храме пред чудотворною иконою вашею приносимое днесь, милостиво услышите, святители Христовы Афанасие и Кирилле, и требующим ваша благодатныя помощи будите предстатели и

молитвенницы, вся благая им дарующе: недужным исцеление, скорбящим утешение, в напастех сущим избавление, да о вас радуящиеся и Бога славяще, воспоем Ему: Аллилуиа.

Икос 11

Светозарнии светильницы и чудотворцы явистесь, святители Божии Афанасие и Кирилле, от лет древних и до ныне Отечество наше не оставляющие: якоже бо глаголет о том древний летописец, во времена нашествия Батыева Велик Новград заступи Бог и вы, святители Христовы. Темже молим вас, отцы святии, прегрешений оставление даровати всем людям российским чтущим любовью святую память вашу и вопиющим тако:

Радуйтесь, яко во всех странах православных имена ваша прославляются.

Радуйтесь, яко и в земли Российстей церкви во имя ваше создаются.

Радуйтесь, полчищам агарян путь на Великий Новград преградившии.

Радуйтесь, страны нашея великоименитии покровители.

Радуйтесь, град Москву храмом в вашу честь освятивший.

Радуйтесь, землю нашу и верных чад Церкви Русския возлюбивший.

Радуйтесь, яко сынове Российскойи ходатайством вашим спасаются.

Радуйтесь, яко вси вернии молитвами вашими от бед и скорбей свободдаются.

Радуйтесь, в тяжких обстояниих и напастех надеждо наша и заступление.

Радуйтесь, всем нам в годину скорбей дивное утешение.

Радуйтесь, яко молитвами вашими Владыку всех умилощивляете.

Радуйтесь, яко вами красуется и укрепляется Церковь Христова.

Радуйтесь, святители Афанасие и Кирилле, Православия столпи непоколебимии и богомудрии учителя.

Кондак 12

Благодать, данную вам от Бога ведуще, память вашу общую празднуем, святители Христовы Афанасие и Кирилле, и усердно к

вашему честному образу притекающе, предстательством вашим, яко неодолимою стеною ограждаемся, явистесь бо нам целители недугов, наставницы заблуждших и скории помощницы всем призывающим вас и воспевающим Христу Богу песнь: Аллилуиа.

Икос 12

Поюще дивное ваше житие на земли и славу яже на Небеси, смиренно молим вас, святители Афанасие и Кирилле, силу свыше православным христианом на враги видимыя и невидимыя даровати; будите нам, отцы всеблаженнии, во всем благии помощницы, благословите нас миром и любовью, подайте нам твердую веру, чистоту жизни и страх Божий, да вси, душевный покой обретше, в радости воспоем вам тако:

Радуйся, Афанасие, безсмертию тезоименитый.

Радуйся, великий учителю Церкви Христовы.

Радуйся, Кирилле, суемудрия Несториева разорителю.

Радуйся, Александрийскаго престола славо и утверждение.

Радуйся, Афанасие, из Отечества твоего правды ради изгнанный.

Радуйся, в тайне любвию паствы твоея хранимый.

Радуйся, Кирилле, добре и верно за честь Пресвятыя Богородицы потрудивыйся.

Радуйся, яко исходу твоему Сама Пречистая Матерь Господа предстояще.

Радуйся, Афанасие, яко великий Антоний завеща тебе ризу свою.

Радуйся, яко мощи твоя во храме Святыя Софии Цареградския положени быша.

Радуйся, Кирилле, премудрости Божия проповедниче.

Радуйся, архиерею Бога Вышняго.

Радуйтесь, святители Афанасие и Кирилле, Православия столпи непоколебимии и богомудрии учителя.

Кондак 13

О пастыри наши всехвальнии, святители Афанасие и Кирилле, примите малое сие моление наше, от умиленного сердца вам приносимое, испросите нам у Христа Бога

утверждение в вере истинней, еже ходити нам в заповедех Господних безпорочно, и к Царствию Небесному предстательством вашим приведите всех, да сподобимся радостно воспевати вкупе с вами победную песнь: Аллилуиа.

Этот кондак читается трижды, затем 1 -й икос: «Избрании от Небеснаго Пастыреначальника... » и 1-й кондак: «Ангели земнии...»

Молитва

О всесвятии отцы Афанасие и Кирилле, теплии наши заступницы, ересей потребители, благочестия защитители, недужным врачеве, в бедах помощницы и всем притекающим к вам теплии предстатели, помозите нам, грешным, в сем житии, и умолите Господа Бога даровати нам грехов оставление и Царствия Небеснаго наследие, да всегда прославляем Отца и Сына и Святаго Духа, и ваше милостивное предстательство, ныне и присно и во веки веков. Аминь.

